

Mirsad Hadžikadić:

Trenutno smo u Neumu, a to je jedini grad koji Bosna i Hercegovina ima na izlazu na more. To je dvadesetak kilometara obale, i Neum je gradić koji je tu smješten. Mi tu imamo kuću, pa smo prošlog petka Mirzeta i ja odlučili da dođemo u Neum jer možemo raditi odavde, i jer je to mnogo bolje okruženje za ljude kojima nije dozvoljeno izlaziti. Pošto imamo kuću, možemo izlaziti vani, plus skoro nikog nema ovdje tako da se može šetati a da nikoga ne ugrozite niti da vas neko ugrozi. Dakle, to je mnogo aktivniji život, a imamo i mrežu i održavamo sastanke putem elektronskih sredstava kao i bilo gdje drugo, tako da je u redu. Znači, mi smo tu. Država pokušava riješiti kako da se izađe iz ove situacije i kako da se polako ukidaju restrikcije, jedna po jedna. Prodavnice su ponovo otvorene, ali još uvijek se primjenjuju pravila o nošenju maski, rukavica, održavanju fizičke razdaljine među ljudima, ograničavanju broja ljudi koji su istovremeno u trgovinama. Mirzeta i ja smo išli na frizuru i frizer je nosio masku i rukavice, mada mi nismo mogli jer nas je šišao. Ali on je bio zaštićen i zaštitio je i nas dvoje time. Bilo je interesantno. Kafići i restorani su počeli raditi prije par dana. Restrikcije za ljude mlađe od 18 i starije od 65 godina su umanjene. Ponovo je uspostavljen javni prevoz, autobusi, tramvaji i takve stvari, s tim da se održava razdaljina među ljudima u njima. Dakle, s te strane se stvari vraćaju u normalu. Odlučit će se i kad će započeti fudbalska sezona bez publike. Mnogo je kontroverzi i dokaza o neprikladnostima. Kod narudžbe respiratora se shvatilo da su korumpirani političari iskoristili ovu nesretnu situaciju da se obogate, ponovo. Naručili su respiratore iz Kine koje ne možemo koristiti, putem kompanija koje ne bi trebale da se bave takvom vrstom nabavke, a koje su povezane s političarima. To je prava prljavština – nefunkcionalna država pokazuje svoju nefunkcionalnost u punom svjetlu. (*Telefon zovi*). Samo sekundu molim te. Poštovanje...“ ...

Javio sam se na ovaj poziv jer je to naš frizer, a on nikad ne zove pa sam morao provjeriti da se nešto nije dogodilo. Rekao je da nije, nego da nekoga šiša i da oni pričaju o meni. On šiša ženu a njen muž se priključio Platformi za progres, pa je želio da me nazove i kaže mi šta se dešava. A ja sam mu rekao da ja pričam o njemu jednom Amerikancu. Interesantno.

Dakle, kad je riječ o tim vrstama radnji, one su sad otvorene i pokušavaju pronaći najbolji način da rade svoj posao za vrijeme restrikcija. To se dešava u državi. Izbori su najavljeni. Novac za 4. oktobar nije alociran – za printanje glasačkih listića, raznih obrazaca za prikupljanje potpisa,

tako da Centralna izborna komisija, kao što sam već spomenuo, vrši pritisak na Vladu da alocira sredstva tako što kažu da neće uraditi ništa dok im se ne dodijeli novac. To u suštini znači da se mijenjaju datumi za nas. Na primjer, do sad smo trebali da imamo obrasce koji se koriste za prikupljanje potpisa. Potpisi se moraju skupiti kako bi se bilo na glasačkim listićima kao politička stranka. Za lokalne izbore, pravilo je da ako niste parlamentarna stranka ni na jednom nivou, odnosno niste dio Parlamenta ni na jednom nivou, bilo da je to gradsko vijeće, kantonalni parlament, entiteski ili državni parlament – ako niste tu, onda morate da skupite potpise. Pošto su ovo naši prvi izbori kao stranke, mi moramo skupiti potpise. U svakoj opštini u kojoj ćemo biti na glasačkom listiću, moramo skupiti potpise, a brojke su sljedeće. Ako ima manje od 10.000 registrovanih glasača u nekoj opštini ili gradu, skupljate 100 potpisa. Preko 10.000 registrovanih glasača, skupljate 200 potpisa. Ali onda morate skupiti i više od toga, jer oni će uzeti uzorak od svega što predate kako bi provjerili validnost, odnosno da li su oni koji su vam dali svoj potpis zapravo registrovani glasači, i da li ste prikupili tačne matične brojeve. Čak i to, možeš li da vjeruješ, matične brojeve i brojeve ličnih karti, i tako dalje. Ponekad ljudi potpišu te papire za dvije ili više stranaka, pa to nisu validni potpisi, itd. Bilo kako bilo, jednom kad se najave izbori, objave se i obrasci, i bude rok od osam dana da se prikupe potpisi širom zemlje, u svakoj opštini gdje smo registrovani kao stranka. Dakle, to je nešto što moramo uraditi. Obrasci nisu izdani, što znači da sat nije počeo da otkucava. Postoji mogućnost da stranke koje formiraju većinu pokušaju da odgode izbore odgađanjem donošenja odluke o alociranju sredstava za Centralnu izbornu komisiju. Mi smo počeli održavati sastanke sa svim našim aktivistima i kandidatima za razne pozicije, sa vodstvom na raznim nivoima – opštinskom, regionalnom, entitetskom. To su sastanci preko Zooma. U ponedjeljak je takav sastanak održan sa regijom Bosna, u utorak sa četiri regije kombinovane, u srijedu sa regijom Sava. Na tim sastancima ih provedemo kroz postupak i kažemo ko su ljudi koji će im pomagati, ko je naša jedinica za izbore. Uspostavili smo jedan tim za izbore koji će pomagati sa svim aspektima oko izbora: kandidatima, opštinskim odborima, regionalnim odborima, itd. Takođe imamo tim za ljudske resurse, tim za komunikacije i marketing, akademiju koja priprema ljude za te pozicije. Dakle, uspostavljena je infrastruktura, dok istovremeno pokušavamo da vidimo kako da platimo sve to, jer mora se uplatiti da se registruje za izbore. Ali, prvi korak je prikupiti potpise kako bi se registrovala stranka za izbore.

Zatim, pred kraj juna i tokom jula im moramo predati listu svih kandidata i moramo uplatiti novac tako da možemo biti registrovani. Počeli smo razmišljati o sloganu kampanje, materijalima i svemu tome, dok istovremeno rješavamo probleme širenja, probleme sa ljudima, pronalazak pravih kandidata na raznim nivoima, i tako dalje. U isto vrijeme, Centralna izborna komisija nije najavila da će izbori biti održani u gradu Mostaru. Mostar je bitan jer je to jedan od gradova gdje je multietničnost najizraženija. Vrlo je podijeljen, ali ipak ima značajno prisustvo Hrvata, Bošnjaka i nešto Srba. On ima istočnu i zapadnu stranu: Hrvati su na zapadnoj a Bošnjaci na istočnoj. To je grad gdje imate dvije škole pod jednim krovom. Ujutro tu idu jedna djeca, a popodne druga, sa drugom grupom nastavnika. Tu izbori nisu održani 12 godina, jer se dvije glavne stranke nisu mogle dogovoriti: SDA na bošnjačkoj strani i HDZ na hrvatskoj strani. Njima se zapravo sviđa to što nema izbora. Oni u rukama imaju ljude, budžet, namjesnike. Mi smo zapravo ponudili političko rješenje, ali niko nije reagovao na to. Pošto Centralna izborna komisija nije najavila izbore u Mostaru, mi smo odlučili da održimo mirnu protestnu šetnju. Ne mogu se održati demonstracije kad je vanredno stanje u državi, ali se može održati mirna protestna šetnja kojom dižete glas protiv nečega. Zato smo kao stranka to najavili, odnosno da ćemo održati takvu mirnu šetnju u subotu u 11:55 (pet do dvanaest), čime takođe pokazujemo kolika je hitnost da se nešto uradi, odnosno da je krajnje vrijeme za promjene. Zato ćemo Mirzeta i ja spakovati torbe u Neumu i ići u Mostar koji je samo sat vremena i petnaest minuta odavde na putu za Sarajevo, a zatim ćemo provesti noć u Mostaru i produžiti za Sarajevo u nedjelju, ili samo nastaviti put za Sarajevo u subotu, vidjet ćemo. Dakle, to je takođe jako važna stvar. Pripremamo transparente koje ćemo nositi tokom mirne šetnje. Nismo tražili policijsku zaštitu, ali oni su odlučili da nam tu zaštitu ipak obezbijede, kako bi se spriječilo potencijalno nasilje. Nije dozvoljeno da tražimo od ljudi da nam se pridruže, jer ne želimo da bude nasilno ni na koji način i ne želimo biti odgovorni ni za kakvo neodgovorno ponašanje bilo koga ko bi nam se mogao pridružiti samo kako bi nanio štetu našem ugledu ponašajući se nedolično. Zato to pokušavamo uraditi na blag način, ali da ipak svima kažemo da smo primijetili to i da niko ništa ne radi, dvanaest godina kasnije, a bit će i šesnaest godina za četiri godine ako se sad ne održe izbori, što samo pokazuje nivo nefunkcionalnosti države. To su uglavnom naše trenutne aktivnosti: organizovanje, priprema ljudi za izbore, njihovo upoznavanje sa logistikom tog

procesa, njihova priprema za sve zadatke koji se moraju obaviti za izbore. Moramo imati 350 do 500 ljudi koji će nadgledati izbore u naše ime, itd. Mnogo je stvari koje se moraju uraditi.

Clark Curtis:

Je li Mostar sad u suštini izgubljen slučaj za izbore, ili ima šanse da se to promijeni ako ljudi postanu dovoljno glasni?

Mirsad Hadžikadić:

Pa, nadamo se da nije izgubljen slučaj, jer oni nisu rekli da izbori neće biti održani, nego su to pitanje jednostavno ignorisali. Mi mislimo da u ovoj zemlji, uz pravu količinu pritiska u pravo vrijeme i uz prave ljude, mnoge stvari se mogu dogoditi. Ovo nije zemlja gdje ljudi puno protestuju. Oni to zapravo jako rijetko rade, čak i kad je situacija grozna, kao što je sada. Oni jednostavno ne protestuju. Mi bismo voljeli da uspostavimo kulturu aktivizma i uključenosti građana u procese, umjesto da samo sjede i čekaju da ovi loši dečki rade što god požele. Ova pandemija je demonstrirala da je, prije svega, država nefunkcionalna i da nas vode nesposobni ljudi, da odluke o ponašanju građana donose nesposobni ljudi. Ja sam zapanjen do koje mjere ljudi u Bosni zapravo slijede pravila, poštuju restrikcije koje su im nametnuli ljudi koji su tako očito nesposobni, ali svejedno. Vjerovatno su to odlučili zbog straha za život te tako čine sve što mogu da se zaštite. Paket ekonomskih mjera i korona zakon su toliko neadekvatni, i činjenica je da je uzet zajam od Međunarodnog monetarnog fonda samo kako bi neki finansirali svoje aktivnosti i da niko ne zna ko će dobiti novac i ko će vratiti novac. To je sve pokazatelj da je država u groznoj poziciji, pa ipak ljudi ne protestuju. Zato se nadamo da ćemo, učinivši ovo, probuditi barem neke ljude.

Clark Curtis:

Vratimo se na obrasce za izbore koji su odgođeni zbog nedostatka sredstava. U koliko se tačno opština nadate da ćete moći dobiti potpise za lokalne izbore?

Mirsad Hadžikadić:

Trenutno mislimo da će to biti oko 35 opština. To bi moglo biti oko pola države... Ne zapravo, nego četvrtina... Možda pola u Federaciji Bosne i Hercegovine, dakle oko četvrtine države.

Mislim da ima četiri ili pet stranaka koje imaju više, ali, teško je to reći, zato nemojte da špekulišem. Uglavnom je oko 35 za nas.

Clark Curtis:

Još jedno brzo pitanje, jer znam da moraš ići. Spomenuo si kako vlasti mogu pokušati da odgode slanje obrazaca pomoću kojih možete prikupiti potpise ljudi po opštinama. Čemu im služi da to odgode i potencijalno odgode glasanje najesen? Kakvoj njihovoj svrsi to služi?

Mirsad Hadžikadić:

Pa, ja mislim da oni samo žele da ovaj utisak o njihovim greškama vezano za pandemiju, jer oni su na vlasti, izlapi iz glava ljudi. Zato pokušavaju da to odguraju što je moguće dalje, kako bi se normalan život nekako ponovo uspostavio, tako da oni onda mogu reći da se bave uobičajenim poslom. Oktobar je preblizu, i ako bi oni to mogli pomjeriti na januar, to bi najviše voljeli, znajući da će do tad biti aktuelne neke druge teme, itd.

Clark Curtis:

Hvala ti. Znam da sad moraš preuzeti sljedeći poziv.

Mirsad Hadžikadić:

Hvala.

Clark Curtis:

Sve najbolje tebi, tvojoj supruzi i punici. Mislimo na vas.